

ՀՈՎՀԱՆՆԵՍ ԻՄԱՍՏԱՍԵՐԻ ՓԻԼԻՍՈՓԱՅԱԿԱՆ ՀԱՅԱՅՔՆԵՐԸ

Գ. Հ. ԳՐԻԳՈՐՅԱՆ

Հովհաննես Իմաստասերը (Սարկավագը, ծնվել է մոտավորապես 1045—1055 թթ., վախճանվել՝ 1129 թ.) միջնադարյան Հայ բազմահարուստ մատենագրության ականավոր այն ներկայացուցիչներից մեկն է, որն իր համակողմանի գիտելիքներով և մանկավարժական գործունեությամբ մեծ հռչակ է վայելել ոչ միայն իր ժամանակակիցների շրջանում, այլև բարձր է դնահատվել հետագա դարերի Հայ բանասերների կողմից։ Սակայն մինչև օրս չկան միջնադարյան այս մեծահամբավ մտածողի ու գործչի աշխարհայացքը վեր հանող քիչ թե շատ ափողփական և ծավալուն ուսումնասիրություններ և, այս պատճառով, դեռևս նկատելի բաց գոյություն ունի Իմաստասերի աշխարհայացքի մասին մեր ըմբռնումների մեջ։ Սույն հոդվածով մենք փորձ ենք անում լուսաբանել Իմաստասերի հայացքների մեկ, այն է՝ փիլիսոփայական կողմը՝ աշխատելով մասամբ լրացնել միջնադարի այդ մտածողի հայացքների մասին մեր իմացության մեջ գոյություն ունեցող բացը։

Իմաստասերն ապրել է XI դարի երկրորդ կեսում և XII դարի առաջին քառորդում, երբ Հայաստանը թևակոխել էր զարգացած ֆեոդալիզմի ժամանակաշրջանը։ Չնայած որ Հայաստանը հենց այդ տարիներին կորցնում է իր քաղաքական ինքնուրույնությունը և ընկնում սելջուկների տիրապետության տակ (Իմաստասերի մանկապատանեկան տարիները զուգադիպում են սելջուկ թուրքերի՝ Հայաստան կատարած առաջին արշավանքներին), բայց ինչպես ցույց են տալիս պատմական փաստերը, Հայաստանում տնտեսության և կուլտուրայի բնագավառում X դարի քսանական թվականներից սկսված վերելքը ընդհանուր առմամբ շարունակվում է։ Այդ դարերում բարձր զարգացման էին հասել դյուլատնտեսությունը, արհեստներն ու առևտուրը։ Հայաստանում կային բազմաթիվ շեն ու բազմամարդ քաղաքներ, որոնք արհեստների ու առևտրի խոշոր կենտրոններ էին։ Հայաստանով էին անցնում Արևելքի և Արևմուտքի միջև կատարվող առևտրի գլխավոր ուղիները, որի հետևանքով ծաղկում ու բարգավաճում են տարանցիկ առևտրական ճանապարհների վրա գտնվող հայկական քաղաքները։ Հայաստանը ներգրավվել էր միջազգային ապրանքափոխանակության մեջ և այդ բնագավառում նշանակալից դեր էր խաղում։ Առևտրի ու արհեստների ընդհանուր զարգացման պայմաններում ընդլայնվում է նեքրին շուկան, հրապարակ են գալիս առևտրա-վաշխառուական կապիտալի ներկայացուցիչներ, որոնք իրենց ձեռքում կենտրոնացնում են մեծ հարստություններ, ճոխ ու շուշլ կյանք են վարում։ Խորանում է հասարակության սոցիալական շերտավորումը։ Փարթամության մեջ ապրող մեծատունների, առևտրա-վաշխառուական կապիտալի ներկայացուցիչների կողքին իրենց խղճով գոյություն են քարշ տալիս բազմաթիվ ընչազուրկներ, օրավարձով ապրող աղքատ, տնանկ, սևագործ մարդիկ։ Հասարակության մեջ մեծ դեր է խաղում փողը, որի կարիքը զգուժ են հասարակության բոլոր խավերը։ Վերջապես, որպես հետևանք այս ամենի, ծաղկում են ապրում աշխարհիկ կյանքն ու բարբերը։

Սրանք էին հաճախ Իմաստասերի ապրած ժամանակաշրջանի ընդունելի գծերը, որոնք իհարկե, չէին կարող չանդրադառնալ Իմաստասերի աշխարհայեցողության վրա։ Նրա հայացքներին հատուկ են առաջավոր շատ կողմեր։ Այսպես, նա հանդես է գալիս բնական գիտությունների զարգացման պահանջով, քննադատում է սխոլաստիկական ու առասպելաբանություններ, մերժում է հեղինակությունները՝ գիտական ճշմարտություններ սահմանելու խնդրում, և գիտելիքներ ձեռք բերելու հարցում մեծ նշանակություն է տալիս փորձին, պահանջում է փորձով ստուգել մեր գիտելիքների հավաստիությունը։ Իմաստասերի հայացքներում արտահայտվող այս առաջավոր կողմերը, անշուշտ, արդյունք են նրա ապրած ժամանակաշրջանի սոցիալ-տնտեսական տեղաշարժերի։

Իր սոցիալական հայացքներով Իմաստասերը հանդես է գալիս որպես ֆեոդալական կարգերի պաշտպան, Սակայն նա քննադատում է ֆեոդալական բռնապետությունը և մարդկանց կոչ է անում միմյանց հետ սիրով միաբանել. «Մարդիկ,— գրում է նա,— պարտին ոչ միայն խառն բնակել, այլև սիրով միաբանել»¹։ Նա պահանջում էր, որ մարդկանց հարաբերությունները խարսխված լինեն փոխօգնության, գթասրտության, համերաշխության վրա։ Մարդասիրությունը նա շատ բարձր էր դասում և հավասարեցնում, նույնացնում էր այն աստվածասիրության հետ։ «Ազգակից են այս երկու առաքինությունքս միմեանց՝ աստուածասիրությունն և մարդասիրությունը»²,— գրում է նա։ Իմաստասերի սոցիալ-քաղաքական հայացքները սահմանափակվում են գոյություն ունեցող ֆեոդալական կարգերը բարոյական առումով բարելավելու, ֆեոդալական հարաբերությունները արդարացիորեն, բանականորեն կազմակերպելու շրջանակներում։ Հենց սրանում էլ թաքնված են նրա հայացքների հակասական էությունն արմատները։

Իմաստասերի ինչպես սոցիալ-քաղաքական, այնպես էլ փիլիսոփայական հայացքների մեջ գոյակցում են հակասական, իրարամերձ սկզբունքներ։ Նրա փիլիսոփայության մեջ քրիստոնեական-կրոնական, իդեալիստական ըմբռնումների կողքին մենք հանդիպում ենք մատերիալիստական, առաջավոր տենդենցների։ Իմաստասերը մի կողմից մեծ նշանակություն է տալիս գիտությանը, գտնում է, որ գիտությանը պետք է անպայմանորեն տիրապետել և պայմաններ ստեղծել նրա հետագա զարգացման համար, ծաղրում է «Իմաստականերին», պահանջում է խորապես ուսումնասիրել բնությունը, բնության ևրեույթներին բնական բացատրություն տալ և փորձով համոզվել գիտելիքների հավաստիության մեջ, մտքեր, որոնք ակնհայտ կերպով հակասում են կրոնական դոգմաներին, իսկ մյուս կողմից դիմում է հավատին և պահանջում է սեր, Լրկուղածություն, հնազանդություն աստվածային օրինականության առաջ։

Հովհաննես Իմաստասերը, ինչպես միջնադարյան հայ մտածողների ճնշող մեծամասնությունը, փիլիսոփայության հիմնական հարցը, այսինքն՝ ոգու և բնության, մտածողության և կեցության փոխհարաբերության հարցը՝ նրանց առաջնության տեսակետից, լուծում է իդեալիստորեն, որը նրա մոտ արտահայտվում է հիմնականում կրոնական աշխարհայացքողության ձևով։ Սակայն, նա ոչ թե դոգմատիկորեն հավաստում է հարցի կրոնական ըմբռնումը, այլ աշխատում է տրամաբանորեն հիմնավորել ու փիլիսոփայորեն մտապատկերել այն՝ օգտագործելով արիստոտելյան հնարավորության և իրականության կատեգորիան և բնդունելի դարձնել բանականության համար։

Աշխարհի, բնության առաջացումը, ըստ Իմաստասերի, հնարավորությունից իրականության անցման պրոցես է։ Բայց ի՞նչն է, որ հնարավորությունից իրականություն է դառնում և ինչպե՞ս է կատարվում այդ հնարավորությունից իրականության անցումը։

Պատասխանելով այս հարցին, Իմաստասերը առարկում է նախ՝ այն բնագետներին ու փիլիսոփաներին, որոնք, ընդունելով, որ նյութը որե՛ք բանից անկախ, հավերժ գոյություն է ունեցել, «զնիւթն առնուն», այսինքն՝ որոնք մերժելով աստծո գոյությունը, որպես սկզբնական նյութ վերցնում են մատերիան և կանգնած են այն տեսակետի վրա, թե հենց նյութը, մատերիան ինքը, առանց ուրիշ ուժի միջնորդությամբ, իր մեջ ունի հնարավորությունից իրականության անցնելու պատճառը, որ մատերիային ներհատուկ է սկզբնական անձև վիճակից վերածվել բազմաձև, բազմազան աշխարհի։

Մյուս կողմից՝ Իմաստասերն առարկում է նաև այն մտածողներին, որոնք պնդում են, թե Թուլ յաւետակից զնիւթն աստուծոյն³, այսինքն գտնում են, թե նյութը և աստված միաժամանակ և հավերժ գոյություն են ունեցել. նյութը չլաւետակից է եղել աստծուն, միայն թե նյութը եղել է անձև, իսկ աստված այդ անձև նյութին ձև է տվել, ձևավորել է։ «Արտաբոյ իմաստութեան աշակերտքն,— գրում է Իմաստասերը,— ասացին՝ յաւետակից աստուծոյ զնիւթն, կամ զաստուած կարօտ նիւթոյ, և ոմանք՝ բնութեամբ զոլ զամենայն և առանց արարիչ»⁴։

¹ «Լուծմունք եօթնից զրոցն Փիլոնի Իմաստասիրի Եբրայեցւոյ», Մատենադարան, ձեռ. № 2595, էջ 274ր։

² Նույն տեղում, էջ 270ր։

³ «Յովհաննու քահանայի յազազս խրատու մանկանց սուգ ինչ քնախաւսութեամբ», Մատենադարան, ձեռ. № 5619, էջ 119ա։

⁴ «Յովհաննու քահանայի յազազս նշանակ հաւատոյ նիկիականն», Մատենադարան, ձեռ. № 2751, էջ 142ա։

Այս երկու տեսակետն էլ նա անընդունելի է դնում: Առաջին տեսակետը անընդունելի է Հետևյալ պատճառներով:

1. Եթե ընդունում ենք առաջացումը և գտնում ենք, որ աշխարհի «բոլոր տեսակները», աշխարհի բազմազանությունը առաջացել են սկզբնական նյութից, ապա այդ դեպքում պետք է ընդունենք, որ սկզբնական նյութը ևս առաջացել է, քանի որ այն և նրանից առաջացած բազմաթիվ տեսակները փոխհարաբերում են իրար այնպես, ինչպես մասը՝ ամբողջին, իսկ մասը ամբողջից բաժանել չի կարելի: Ուրեմն, եթե աշխարհի տեսակներն առաջացել են սկզբնական նյութից, ապա ինքուր սկզբնական նյութը ևս որևէ բանից զոյացել է, և, ընդհանրապես, եթե սկզբնական նյութը չի առաջացել, ապա չեն առաջացել և նրա մասերը: Իմաստասերը գրում է. «Եթե աշխարհի տեսակներն եղականք են՝ նա ասել պիտի, թէ և այն առաջին նիւթն, որ կայր եղական է, քանզի մասն ի բոլորեն ոչ բաժանի, ապա թէ՛ այն նիւթն անլիներէի է, ոչ է նայ ի նախախնամութենէն և ոչ իւր մասունքն եղական է՝ տունք և կենդանիք»¹:

2. Նյութը հավերժ գոյություն չի ունեցել, քանի որ դրանով՝ ուղղակի մերժվում է աստծո սրբաբնիկ լինելու գաղափարը: «Երբ զնիւթն միշտ կու ասեք և ոչ յաստուծոյ սկսեալ, ապա զաստուծո՞ւ արարիչ չէք յասել»², — դրում է Իմաստասերը: Բացի դրանից՝ «նիւթն անմարմին ոչ ինչ է» և ամենակարող արարիչը «ոչ կարաւտ նիւթոյ աւտար»³:

Անդրադառնալով երկրորդ տեսակետին, բայտ որի նյութը և աստված «յաւետակից» են և աստված միայն նյութին ձև է տվել, Իմաստասերը գտնում է, որ այս տեսակետի պաշտպանները հետևողական չեն: Նրանք, հակասելով իրենց իսկ, ընդունում են աշխարհի ստեղծագործված, սկզբնավորված լինելու թեզը, քանի որ նրանք ընդունում են, որ այն ժամանակ, երբ կար նյութը, աշխարհը դեռ չկար, և աստծո միջնորդության շնորհիվ միայն աշխարհը աշխարհ դարձավ, «զարդարելովն եղև աշխարհ աշխարհս»: Ուրեմն, եզրակացնում է Իմաստասերը, այս տեսակետի պաշտպանները դարձյալ ընդունում են աշխարհի սկզբնավորումը, թեպետև գտնում են, որ աշխարհն անսկիզբ է: Այս կապակցությամբ նա գրում է. «զանգարդ նիւթն ասէին, թէ միշտ էր և աստուած զայն զարդարեաց, որ է աշխարհս, առ որս ասեն, թէ երբ զարդարեաց զանգարդն, ապա չունէր զարդ և չէր աշխարհ և զարդարելովն եղև աշխարհ աշխարհս: Ապա դիւր զիւր անսկիզբն ասեք զաշխարհ, որ յետոյ զարդարելովն եղև, որպէս դուք ասէք, թէ զարդարեաց միայն զնիւթն: Թէպէտ և զայդ ասէք, սակայն և այդպէս սկիզբն ցուցանէք»⁴:

Այսպիսով, Իմաստասերը իղեալիզմի դիրքերից քննադատում է աշխարհի առաջացման վերաբերյալ մատերիալիստական և դուալիստական տեսակետները: Նրա քննադատությունն ուղղված է, ինչպես դժվար չէ նկատել, անտիկ մտածողների դեմ, որոնց նա աշխատում է հերքել՝ նրանց մատերիալիստական աշխարհըմբռնման մեջ տրամաբանական հակասություններ բացահայտելու ճանապարհով՝ հենվելով ֆորմալ տրամաբանության վրա:

Իմաստասերը մերժում է անտիկ աշխարհի մատերիալիստական ուսմունքները: Նա դեմ է էպիկուրի՝ նյութի հավերժական լինելու մասին կարծիքին: Էպիկուրը, գրում է նա, «յաւետակից ասիցէ զնիւթն աստուծոյ, թէ հիւղէ էր իւր և փոշի, որ խաղա ի շողն յոր մեզ չորս տարս արար»⁵: Նա մերժում է աշխարհի, բնության առաջացման մասին Պլատոնի, Պիտագորի հետևորդների և էպիկուրյանների ուսմունքը: «Այդ՝ որ նորա ասեն, — դրում է Իմաստասերը, — պիտոնացիք և ակադեմիականք և էպիկուրեանք նախանձու և հակառակող բանք են, մեր ճամբիտ և իմաստուն բանս խնդրեմք և ընդդէմ նոցա չիճող բանից դնեմք»⁶: Ընդհանրապես Իմաստասերը կատեգորիկ կերպով ժխտում է աշխարհի առաջացման մասին բոլոր այն «Իմաստասերների» ուսմունքները, որոնք այս կամ այն կերպ շեղվում են աստծո արարչագործությունը ընդունելու տեսակետից. «զոր իմաստունքն ասացին յայլ և այլ պատճառէ եղեալ զաշխարհս և անպական. արդ՝ մի լիցի զայս ասել, բայց միայն յաստուծոյ սկսեալ»⁷:

Կանգնած լինելով հիմնականում բրիստոնեական-կրոնական մտայնության դիրքերում, Հովհաննես Իմաստասերը աշխարհի առաջացման հարցում զարգացնում է բրիստոնեական կրոնին

¹ Մատենադարան, ձեռ. № 2595, էջ 246ա:

² Նույն տեղում, էջ 242ա:

³ Ա. Գ. Լկրամույան, Հովհաննես Իմաստասերի մատենագրությունը, Երևան, 1956: էջ 306:

⁴ Մատենադարան, ձեռ. № 2595, էջ 242ա:

⁵ «Լուծմունք նախախնամութեան Փիլոնի», Մատենադարան, ձեռ. № 59, էջ 11ր:

⁶ Մատենադարան, ձեռ. № 2595, էջ 242բ:

⁷ Նույն տեղում:

ըստ Հուլիան չհակասող լմբռնում: Աշխարհի, տիեզերքի գոյացումը, ըստ նրա, հնարավորությունից իրականություն անցման պրոցես է: Գեն նեոսելով արիստոտելյան հնարավորություն և իրականության կատեգորիայի մատերիալիստական բովանդակությունը, Իմաստասերը այդ պրոցեսը պատկերացնում է հետևյալ կերպ: Նա գտնում է, որ եղել է ժամանակ, երբ գեն գոյություն չի ունեցել որևէ ինչ, և գոյություն է ունեցել միայն անսոված: Նա իմացել է այն ամենի կազմությունը, ինչ որ այժմ գոյություն ունի, ինչ որ նա ինքը հետագայում ստեղծեց, այսինքն, ըստ նրա, ամբողջ բնությունը որպես ռեալականություն գտնալու հնարավորություն կար աստծո մտքում:

Աստված, Իմաստասերի ըմբռնմամբ, գոյությամբ է ժամանակից ու տարածությունից, անորակ է ու անքանակ: «Աստուած,— գրում է նա,— սնորակ, անքանակ, ոչ ի տեղոջ»: Նա ամեն ինչի ստեղծողն է. նա որպես ստեղծագործող ամեն ինչ բովանդակել է իր մեջ, բայց ինքը ոչ մի բանի մեջ չի բովանդակվում: «Հաստիչ բնության և գոյացության, որ զամենայն բովանդակել և չիմերել ինքն ոչ բովանդակի»²: Այս պատճառով, գրում է Իմաստասերը, երբ ասում ենք, թե գոյություն ունեցողը սահմանվում է երկու կերպ, որպես հնարավորություն և որպես իրականություն («զարույթնամբ» և «ներգործութեամբ»), ապա «զարույթնամբ» տակ միշտ նկատի ունենք արարիչը, որովհետև անցումը անորոշությունից զեպի որոշակիություն, անկատարելությունից զեպի կատարելություն, անձեռնությունից զեպի որոշակի ձև, կատարվում է աստծո կամքով, նրա գիտությամբ: «Ջաստուած,— գրում է Իմաստասերը,— ո՛չ անգործ երբևր գոյ և պարապողը նախ քան զլինելն ամենայնի... այլ զարույթնամբ միշտ գոյ արարիչ և իմանալ աստուածայալ և զամենայնի զեղեցկայարմար և քաջալիքի կազմութիւն: Փանգի ոչ ժամանակու աստուածութիւնն և կեցեցել ի կատարումն: Եթէ արարիչն ոչ գոյ անկատարութիւն իցէ, իսկ գոյն արարիչ՝ կատարելութիւն, ապա ուրեմն իմանալովն, գոր ևթէ զարույթնամբ որ ասացէ, եղիցի միշտ արարիչ»³:

Սակայն ինչի՞ց աստված ստեղծեց աշխարհը:

Ահա այստեղ էլ փիլիսոփան ձգտում է բանականության համար ընդունելի դարձնել աշխարհի գոյացման մասին քրիստոնեական-կրոնական ուսմունքը:

Հայտնի է, որ կրոնական պատկերացման համաձայն, աստված աշխարհը ստեղծեց ոչնչից: Իմաստասերին չի բավարարում այսպիսի պատասխանը: Իրավացի համարելով այն առարկությունը, թե ինչպե՞ս ոչնչից կարող է որևէ ինչ լինել, «չոչնչէ ի՞նչ ցեղ իրք լինի»⁴, նա աշխատում է բանականության համար ընդունելի տեսակետ առաջ քաշել:

Ըստ Իմաստասերի, այս իրականությունը ստեղծված է աստծո կողմից ոչ թե ոչնչից, այլ անմարմին նյութից, որը, սակայն, ըստ Հուլիան տարբերվում է սովորական այն տարրերից, բրոնզից կազմված են աշխարհը, մեղ շրջապատող առարկաները: Սկզբնական նյութը, որից ստեղծված ստեղծել է աշխարհը, դա կոնկրետ, շոշափելի այն նյութը չէ, որը «ենթակա» նյութ է հանդիսանում բնության զանազան գոյացումների համար, ինչպես, օրինակ, բուրդը նյութ է ծառայում գործվածքի համար: Այդ անմարմին նյութը աստծո կամքն է, որը և նյութ է հանդիսացել աստծո համար՝ ստեղծելու կոնկրետ իրերը: «Թուի ինձ,— գրում է Իմաստասերը,— ոչ անգանչել, եթէ զկամսն զայն և զիմացումն աստուածային մշտնջենաւորական յամենայնի կազմութիւն անուանեցէ որ նիւթ անմարմին, չորմէ տեսակագործեցան եղակունք: Նիւթ ասեմ ո՛չ իբրեւ մասն ինչ և ենթակալ կազմածոյն, ըստ որում ասը ոստայնի, այլ անմարմին բարձրորակ կամս և զարույթիւն: Փանգի այլ է նիւթ ենթակալ գործոյ և այլ զարույթիւն և կամք աստուծոյ, զի սա առնէ, իսկ նայ լինի»⁵:

Բայց սրանից հետևում է նաև այն, որ աստծո համար ստեղծագործության նյութ է հանդիսացել հենց աստվածն ինքը, որովհետև նրա «կամքն», «զարույթիւնն» գոյություն ունեն նրա մեջ, նրա հետ միասին և ոչ թե նրանից անկախ, հանդիսանում են նրա մասը, իսկ, ինչպես ասում է Իմաստասերը, մասն ամբողջից չի կարելի բաժանել՝ «մասն ի բոլորէն ոչ բաժանի»⁶: Այստեղից միայն է ծագում՝ արդյո՞ք աստված ինքը չէ, որ վերածվում, վերափոխվում է բնու-

¹ Մատենադարան, ձեռ. № 2751, էջ 142ա:

² Նույն տեղում:

³ Հովհաննես Իմաստասերի մատենադրությունը, էջ 306:

⁴ Մատենադարան, ձեռ. № 59, էջ 17բ:

⁵ Հովհաննես Իմաստասերի մատենադրությունը, էջ 306—307:

⁶ Մատենադարան, ձեռ. № 2595, էջ 246ա:

թյան, հնարավորությունից դառնում է իրականություն: Բայց Իմաստասերը նման եզրակացություն չի հանգում, քանի որ այն վտանգավոր էր եկեղեցու համար: Եթե աստված վերածվեր և միախառնվեր բնությանը, ապա նա որպես այդպիսին կդադարեր գոյություն ունենալուց: Նման եզրակացությունը մոտենում է պանթեիզմին, իսկ պանթեիզմը, միանգամայն հասկանալի պատճառով, հակադրվում է կրոնական աշխարհայացքին:

Այսպիսով, ինչպես ակնհայտ է, փիլիսոփայության հիմնական հարցին Իմաստասերը տալիս է իրենալիստական լուծում, որը չնայած փիլիսոփայական երանգավորմանը, համընկնում է հարցի քրիստոնեական—կրոնական ըմբռնմանը: Փիլիսոփայության հիմնական հարցի մեկնաբանման բնթացքում՝ Իմաստասերի ամբողջ մտակառուցման մեջ արժեքավորն այն է, որ նա հանգես է դալիս ոչ թե որպես կրոնական զոգմաները կուրորեն կրկնող մի եկեղեցական, այլ որպես փիլիսոփա և մտածող, որն աշխատում է տվյալ հարցի կրոնական ըմբռնումը բնորոշելի դարձնել բանականության համար:

Իմաստասերը հասկանում է, որ աշխարհի արարչագործության իր ըմբռնումը դժվար ապացուցելի է: Գիտակցելով այս, աշխարհի՝ աստծո կողմից ստեղծագործված լինելու իր տեսակետը Իմաստասերը դասում է հավատի բնագավառը: Նա գրում է. «Գի հաւատով ճանաչեմք, եթէ աշխարհս ի աստուծոյ սկսեալ է և ի նմանէ նախահնամի և ոչ են ինչնեղր և անխնամ, որպէս հեթանոսաց իմաստուննն ասացին, զոր և երանելին Փիլոն խրատելով ուրուցանէ զԱդրասնդրու և զԼուսիմարոս՝ ի բաց կալ լաչնպիսի սուտ կարծեաց և հաւանել աստուածային օրինաց վարդապետութեանն, որով վարժեալ էր Փիլոն»¹:

Ըստ Իմաստասերի աշխարհը, ամբողջ բնությունը և մարդը մեկ անգամ բնորոշող ստեղծված լինելով աստծո կողմից որպես նոր որակ այլևս տարբերվում են նրա արարչից: Աստված ստեղծելով աշխարհը զգիւր կնիքն դնէ ի վերա ամենեցուն², բայց, նրա ըմբռնմամբ, «այլ է աստուածայինն և այլ մարդկայինն գոյացութիւն ըստ ինքեան»³: Նրանց տարբերությունը արտահայտվում է նաև այն բանում, որ նրանցից մեկը՝ աստված, անսկիզբ և անվախճան է, իսկ մյուսը՝ բնությունը, բուսական և կենդանական աշխարհը, մահկանացու և վախճանական են⁴:

Ընդունելով, որ աշխարհը աստծո ստեղծագործություն է, Իմաստասերը միաժամանակ զարգացնում է այն տեսակետը, թե բնությունը, ստեղծագործված լինելով, ինքր ևս հանգես է դալիս որպես ստեղծագործող: «(Աստուած) ոչ միայն արարիչ ասի,— գոռմ է Իմաստասերը,— այլև արարչագործ, զի իւր արարածքն այլոց արարիչ լինի»⁵: Այսինքն, բնությունը՝ աստծո ստեղծագործությունը, արդեն առանց իրեն ստեղծողի միջամտության, ինքր հանգես է դալիս ստեղծողի դերում: Բնությունը տվյալ դեպքում իր արարչից տարբերվում է նրանով, որ նա որպես ստեղծագործող հաջորդում է աստծուն. «պարտ էր, որ յառաջ իրացն սկիզբն լինի և ապա ալու ի նմանէ աճեն»⁶: Բնության մեջ, իրենին ու երևույթներին ներհատուկ օրինաչափությամբ, տեղի են ունենում ծագում, զարգացում, բնույթում և այլ երևույթներ ու պրոդեսներ: Բնության բոլոր իրերն ու երևույթները, ըստ Իմաստասերի, որոշ պատճառականության արդյունք են:

Ամբողջ արտաքին աշխարհը, ասում է Իմաստասերը հետևյալով Արիստոտելին, գոյություն ունի երկու կերպ՝ «զարութեամբ և ներգործութեամբ», այսինքն՝ որպես իրականություն և որպես հնարավորություն: Նա գրում է. «Երկու միայն են, որոնք զլինելու թիւն ամենայնի ստորոնցին սահմանել... զզարութեամբ ասել և զներգործութեամբ»⁷: Սա նշանակում է, որ աշխարհում ամեն ինչ գոյություն ունի կամ արդեն որպես ռեալականություն՝ տեսանելի, շոշափելի կամ որպես ապագայում այդպիսին դառնալու հնարավորություն: Բացահայտելով վերո բերած միտքը, Իմաստասերը գրում է. «Եւ է զաւուրութեամբ ամատ իմն և սկիզբն ի ներգործութեան գոյ հանգերծելոցն: Այսինքն՝ որ չեն է ալինչ կամ թէ էութիւն զգալի, բայց կարողուն է լինել յալնմանէ, որ ի լինելոցն է»⁸: Այսպիսով, բնության մեջ անընդհատ տեղի է ունենում անցում հնարավորությունից իրականության, կամ առաջացում, ծագում:

¹ Մատենադարան, ձեռ. № 2593, էջ 242ա:

² Նույն տեղում, էջ 261ա:

³ Մատենադարան, ձեռ. № 2751, էջ 227ա:

⁴ Տե՛ս նույն տեղում, էջ 220ա և 227ա:

⁵ Մատենադարան, ձեռ. № 2593, էջ 274բ (ընդգծումն իմն է—Գ. Գ.):

⁶ Նույն տեղում, էջ 242բ:

⁷ «Հովհաննէս Իմաստասերի մատենագրութիւնը», էջ 306:

⁸ Նույն տեղում:

Գենդանական և բուսական աշխարհը, բնության բոլոր իրերը, որոնք որոշակի որակ ունեցող մարմիններ են, համաձայն Իմաստասերի, կազմված են տարրերից: «Զորակութիւնս ունող հիւթոց մարմնոյն, որ են խառնուածք տարերց և մարդ ընդ միմեանս բնաւորապէս ունենալ: Տարրերն են «մասունք աշխարհիս» և բնութիւն բոլոր առարկաները, անշունչ թե շնչավոր, տարրերի խառնուրդ են՝ որոշակի փոխհարաբերութիւններ: Փոփոխութիւնը իրերի և առարկաների մեջ տեղի է ունենում տարրերի փոխհարաբերութիւնը փոխվելու շնորհիւ:

Հետևելով անտիկ որոշ փիլիսոփաների, Իմաստասերը ևս կանգնած է այն տեսակետի վրա, թե տարրերը չորսն են՝ օդը, հողը, ջուրը և կրակը: Այս տարրերը իրարից տարբերվում են իրենց կշռով և հատկութիւններով: Սրանք միմյանց ներհակ են, բայց «թիպլատ և հակառակ են իրերաջ, ալ ի սոցանկ եղև աշխարհս»²: Բնութիւն չորս տարրերը երբեք միմեանց վիճակի մեջ չեն մնում: «Տարրերն շարժական և փոփոխական են»³,— գրում է Իմաստասերը: Նրանք փոխակերպվում են մեկը մյուսին, մի տարր որոշակի պայմանների առկայության դեպքում անցնում է մյուսին, այնպես որ մեկի էությունից գոյանում է մյուսը: «Տարրերն ի միմեանց էութենէլ գոյանան, որպէս ի ջեռնով ջրոյ և ի շիջեալ հրոյ օդն լինի, նոյնպէս և ջուրն սկանայ և լինի հող, նոյնպէս և ալլն»⁴: Տարրերի այս փոխակերպումը կատարվում է իրենց՝ տարրերի բնութիւնը ներհատուկ օրինաչափութիւններով:

Իմաստասերը գտնում է, որ բնութիւն բոլոր իրերն ու առարկաները անընդհատ շարժվում և փոփոխվում են, բայց նա այդ փոփոխութիւնը հիմնականում մետաֆիզիկոսն է ընկալում: Նա ենթադրում է, որ բնութիւն մեջ չի առաջանում նոր իր, առարկա, որը չլիներ առաջ: Այսպես՝ նա կարծում է, թե կենդանիների նոր տեսակներ երբեք չեն գոյանում և եղածներն էլ չեն ոչնչանում: «Մի ապականեսցին սեռը և տեսակ կենդանեաց,— գրում է նա,— ալ փոխանորդութեամբ մնասցէլ ամենայն առանց եղծման և ապականութեան ի պակասութենէլ նմա»⁵: Իմաստասերի մոտ մենք չենք հանդիպում աշխարհի բնապատմական զարգացման տեսութիւն, և մեզ թվում է, այդպիսի տեսութիւն նա չէր էլ կարող ստեղծել, քանի որ այն բացարձակ կերպով կհակասեր եկեղեցու ըմբռնումներին:

Սակայն, քանի որ Իմաստասերը ծանոթ էր անտիկ փիլիսոփայութիւնի նշանավոր դիալեկտիկ մտածողներին՝ Հերակլիտին, Արիստոտելին, և հատկապէս չափով կրում էր նրանց ազդեցութիւնը, նրա հայացքներում նկատվում են դիալեկտիկայի որոշ տարրեր: Այսպես, ըստ Իմաստասերի, բնութիւն մեջ ամեն ինչ գտնվում է շարժման, փոփոխման վիճակում և ունի իր սկիզբն ու վախճանը: «Ապականութիւն,— գրում է նա,— տնկակից է ամենայն իրաց, և՛ կենդանեաց, և՛ անկենդանաց, որոց և նուազեն շարժակցի»⁶: Ոչինչ չկա աշխարհում, որ հավերժական լինի, «ի՞նչ ցեղ չասեմ ապականացու զաշխարհս, ալլ երազահանական առասպելացն հաւանիմ»⁷,—ասում է Իմաստասերը:

Բացի դրանից, Իմաստասերը խոսում է նաև բնութիւն իրերի մեջ գոյութիւն ունեցող հակադրութիւնների մասին: Այդ հակադրութիւնները գոյանում են իրարամերձ տարրերից, որոնք ախտյան լինելով հանդերձ գտնվում են միմեանց իրի մեջ, հակադիր լինելով՝ «սիրով» միմեանում են իրար: «Չկան ալլ ինչ իրք,— գրում է նա,— որ սիրեն զմիմեանս և միաբանին, որպէս մասունք աշխարհիս, որ են տարերքդ»⁸: Հակադրութիւններն օրինաչափ ու անհրաժեշտ են բնութիւն բոլոր առարկաների համար: Ամբողջ բնութիւնը հակադրութիւնների ներդաշնակ միացում է, ինչպես քնարի հաստ ու բարակ լարերը միասին հնչելով ստեղծում են ներդաշնակութիւն, այնպես էլ հակադրութիւնները իրերի մեջ միանում են որպէս ներդաշնակ միասնութիւն: «Բնութիւնն ամենայն իրաց,— գրում է Իմաստասերը,— ի յարմարութենէլ ընդդիմակաց լինիցի, որպէս է տեսանել ի լարս քնարից, յորժամ սուրն և բութն ընդ իրար՝ միաբան հնչեն»⁹:

1 Մատենադարան, ձեռ. № 2751, էջ 212ա:

2 Մատենադարան, ձեռ. № 2595, էջ 246բ:

3 Նույն տեղում, էջ 278բ:

4 Նույն տեղում, էջ 260բ:

5 «Հովհաննես Իմաստասերի մատենագրութիւնը», էջ 303:

6 Մատենադարան, ձեռ. № 2751, էջ 221ա:

7 Մատենադարան, ձեռ. № 2595, էջ 242բ:

8 Նույն տեղում, էջ 260բ:

9 Նույն տեղում, էջ 253ա:

Բնության իրերի այսպիսի ըմբռնումն իմաստասերի կողմից չափազանց արժեքավոր է, բայց նրա աշխատություններում չի ստանում այնպիսի ծավալուն շարադրանք, որ հնարավոր լիներ հարցը քննարկել ու վերլուծել իր մանրամասնությունների մեջ: Սակայն, հենվելով բնության իրերի նրա ըմբռնումների վրա, կարելի է անել այն հետևությունը, որ իմաստասերը կանգ չի առնում իրերի մեջ գոյություն ունեցող հակադրությունների փաստի լուկ արձանագրման վրա: Նա գտնում է, որ այդ հակադրությունները հիմք են հանդիսանում բնության իրերի փոփոխության համար: Այսպես, մենք արդեն ասացինք, որ ըստ Հովհաննես իմաստասերի բնության բոլոր առարկաները՝ թե՛ շնչավոր, և թե՛ անշունչ, կազմված են տարրերից, որոնք յուրաքանչյուր առարկայի մեջ հանդես են գալիս որոշակի փոխհարաբերությամբ: Քանի դեռ այդ հակադիր տարրերը իրի մեջ գտնվում են «շտփառութեան», «բարեխառնութեան» վիճակում, իրը պահպանում է իր գոյածեր, բայց երբ այդ վիճակը խախտվում է, իրը սկսում է քայքայվել: Այս ամենից հետևում է, թե, ըստ իմաստասերի, բնության իրերը հակադրությունների միասնություն են և այդ միասնությունը հարաբերական է: Միասնությունը պահպանվում է այնքան ժամանակ, քանի դեռ հակադրություններից, հակադիր տարրերից մի կողմի չի գերակշռել մյուսի նկատմամբ, չի «հաղթահարել» մյուսին: Երբ այսպիսի գերակշռությունը դառնում է բացարձակ, փոփոխվում է իրի գոյածեր: Տարրերի «ի հաղթահարելն ի միմեանց,— գրում է իմաստասերը,— և ի յառուևություն կամ ի պակասելու և դարձյալառութեանն և զշտփառութեանն հարկ է վախճանել կենդանության»¹:

Իմաստասերը գտնում է, որ ամեն ինչ ունի իր պատճառական կապակցությունը, որ առանց պատճառի ոչինչ լինել չի կարող: «Առանց պատճառի չկա իրք, և ես քեզ վկայեմ»²,— գրում է նա:

Այսպիսով, ինչպես տեսնում ենք, իմաստասերի փիլիսոփայական-բնագիտական հայացքներում արտահայտվում են բնության իրերի և երևույթների դիալեկտիկորեն ըմբռնելու որոշ էլեմենտներ: Անշուշտ, ինչպես դժվար չէ համոզվել, դիալեկտիկայի այդ էլեմենտները հետևանք են անտիկ փիլիսոփայության գրական ազդեցության:

Հովհաննես իմաստասերը գտնում է, որ եթե աշխարհի՝ աստծո կողմից արարչագործված լինելը ճանաչվում է հավատով, ապա բնության երևույթները, իրերը կարելի է ճանաչել դրանք ուսումնասիրության ենթարկելով միայն: Նա պահանջ է առաջադրում՝ թափանցել բնության գաղտնիքների մեջ, բացահայտել նրանց հույությունը, խորապես ճանաչել մեզ շրջապատող աշխարհի օրինաչափությունները: Իսկ այս պահանջն իր ժամանակին անշուշտ առաջավոր էր: Չպետք է մոռանալ, որ նույն ժամանակ կրոնական ուղղափառ մտայնությունը քարոզում էր հրաժարվել ամեն տեսակ աշխարհիկ գործունեությունից, ճգնափորական կյանքի դիմել, մեռցնել մարմինը՝ անդրաշխարհային կյանքում երջանիկ լինելու համար և այլն, և այլն:

Իմաստասերն աշխարհի իրերն ու երևույթներն աշխատում էր մեկնաբանել բնագիտական տեսանկյունից: Նա դեմ էր բնության երևույթների միստիֆիկացմանը և պայքարում էր սնտիսպալաշտության ու առասպելաբանության դեմ: «Վասն կիկլոպացոց երկրին զինչ որ ասեն սուտ է և առասպել»³,— գրում է նա: Իմաստասերը բնության երևույթներն ամեն կոնկրետ դեպքում աշխատում էր բացատրել ոչ թե գերբնական, այլ բնության ուժերով՝ իհարկե, իր դարաշրջանի գիտության նվաճումների սահմաններում:

Ճշմարտության առաջ մեղանշած չլինելու համար, սակայն, պետք է նշել նաև, որ իմաստասերը միշտ չէ, որ կարողանում էր խուսափել բնական երևույթների առասպելական միստիկական բացատրությունից: Նա լիովին չի կարողանում դուրս գալ կրոնա-միստիկական մտայնության սահմաններից:

Ըստ իմաստասերի, մարդը, ի տարբերություն գոյություն ունեցող բոլոր մյուս կենդանի արարածների, բանական էակ է, միայն նա է օժտված բանականությամբ: Իհարկե, իմաստասերը ևս մտածում էր, թե բանականությունը մարդուն տվել է աստված: Մարդը ստեղծված է որպես բանական էակ, որպեսզի իր գոյության պահպանման համար կարողանա ճանաչել աշխարհը, նրա իրերն ու երևույթները: Իր մի կրոնական աշխատության մեջ նա այն միտքն է արտահայտում, թե մահկանացու մարդը, որը միանգամայն տարբերվում է աստծուց, հոգու և մարմնի անբաժանելի միասնություն է: Նա գրում է. «Վասն այսպիսի գոյոյ զմարդն (այսինքն՝ մարդի»

¹ Մատենադարան, ձեռ. № 2751, էջ 212բ (ընդգծումն իմն է—Գ. Գ.):

² Մատենադարան, ձեռ. № 2595, էջ 247ա:

³ Նույն տեղում, էջ 248բ:

հոգու և մարմնի միասնությունը լինելով—Գ. Գ.), այս միջև՝ արժան իցէ տրամատելա՝ (Բարձրնը և հոգին, բոստ Իմաստասերի, ունեն տարբեր ֆունկցիաներ, «գործ մարմնոյ աչն է, որ արին և շունչ գործէ ի կերակրոյն»², իսկ մարդու հոգու ֆունկցիան բանականությունն է։

Իմաստասերը գտնում է, որ կենդանիները բոլոր գեղեցիկում առաջնորդվում են սոսկ բնագ-
ղով։ Թեև կենդանիները ևս ունեն գործելու ունակություն, բայց և այնպես, ի տարբերություն
մարդու, նրանք այդ կատարում են իրենց բնագղով։ «Մի՛թիւ արուեստի և խորհրդով պործ
մեղուն և սարգն, որ ուսեսլ է և կու մարթէ առնել,— հարցնում է նա և պատասխա-
նում,— ո՛չ, այլ ի բնութենէ, առանց խորհելոյ և արուեստի ուսանելոյ, զի հնարքն և
արուեստքն բանականի է»³։ «Մեղուն և ծիծառն և ալբն,— գրում է նա մի ալ տեղ,— ոչ ևթի
նախ իմացութեամբ առնեն, այլ ի բնութենէ ունին»⁴։ «Զգիտութիւնն և զիմաստքն,— կատե-
գորիկ կէշտով պնդում է Իմաստասերը,— ի բանականքս է և ոչ ի շնչաւոր անասունք... ո՛չ յա-
նասունքն, ոչ յանշունչքն խորհրդով և նախահոգութեամբ չէ, այլ առանց կամաց, բնութեամբ
միայն»⁵։

Իմաստասերը գտնում է, որ մարդկանց և կենդանիների գործողությունները, նրանց գոր-
ծունեությունը էապես տարբերվում են իրարից։ Մարդկանց գործունեությունը կանխամտածված
է, գիտակցված, նախօրոք պլանավորված, մինչդեռ կենդանիների գործունեությունը հիմնված է
բնագղի վրա։ Այս էական տարբերության պատճառով կենդանիների ստեղծագործությունները
նման են իրար, չունեն իրենց անհատականությունը, մինչդեռ մարդկանց ստեղծագործության
մեջ չկա այդ միօրինակությունը։ «Քանզի մարդիկ,— գրում է Իմաստասերը,— թէպէտ տեսալիս
մի են և հաւասար, բայց գիտութեամբ և փարթամութեամբ անդոյզ են, որսլս է տեսանել ի
սուն և ի քաղաք, որ շինեալ են և բնակին, իսկ մեղուն և մրջիւն միապէս գործեն և չկայ զա-
նազանութիւն ի նոսա»⁶։

Ըստ Իմաստասերի, ինչպես մարդուն՝ բանական էակին, նույնպես և կենդանիներին բնու-
թյունից տրված է իրենց գոյությունը և սերունդը պահպանելու հատկությունը։ «Ոչ միայն բու-
նտեանը, ալի սմէնայն կենդանիի բնատրեալ է պահել զինքն ի մահուանէ»⁷,— գրում է նա։
Սակայն մի էական տարբերությամբ՝ կենդանիներին մոտ ալ հատկությունը, ինչպես նրանց
ամբողջ գործունեությունը, գուրկ է գիտակցական հիմքերից. նրանք ալ չեն անում կանխա-
մտածված կերպով, և գոյության պահպանման համար նրանց կատարած գործողությունները
սոսկ բնագղական մղում են։ «Մի՛թիւ գիտութեամբ առնէ զայն ծիծառն, թէ այս ինձ օգուտ է և
կամ թէ փութ առարինութեան ունին կենդանիքդ և զայն, որ տեէ և մնալ սղզն աճմամբ,
կարծես թէ նախախնամութեամբ հոգան և ապալ գործեն»,— հարցնում է Իմաստասերը և պա-
տասխանում. «Ճարն և դժուարին է զայս կարծել, թէ նորա խորագիտութիւն ունին և իմաստու-
թեամբ վարին»⁸։

Իմաստասերը գտնում է, որ կենդանիների մոտ սերունդը պահպանելու ունակությունը ևս
գիտակցված չէ։ Այս կապակցությամբ նա գրում է. «Շէ թէ ուսեալ և զայն մուկն, որ յառաջ քան
գայն, որ ծնանի և աճէ ի յորջն ցանկալ մտանել, բազում անգամ լինի, որ արտաքոյ որջոյն ձգէ
զձագսն»⁹։ Առարկելով նրանց, ովքեր հակված են կենդանիների գործողությունները նրանց գի-
տակցությամբ բացատրել, Իմաստասերը, գրում է. «Ի բաց պիտի տանել զցնորս մտադն այ-
նոցիկ, որք կարծեցին, թէ շունն զայն, որ գնաց ու եկաւ յաջ և յահեակ... մտաց զօրութեամբ
արար և կամ թէ այն, որ գիտեմորթն ուտէ և կամ թէ այլ ինչ, որ զհետ այնորիկ երի՛ կար-
ծիս տայ բանի մասին»¹⁰։ Կենդանիների մասին «չէ պատեհ ասել, թէ քնտրութեամբ և յառա-
հահոգութեամբ առնեն զգործն, այլ բնութիւնն բաշխեաց և ետ զայն ընտանի և ի յար խրա-
բանչիւրոց»¹¹։ Գիտակցականության առումով՝ կենդանիներին ոչ մի պարագայում չի կարելի

1 Մատենադարան, ձեռ. № 2751, էջ 198ա։

2 Մատենադարան, ձեռ. № 2595, էջ 249բ։

3 Նույն տեղում, էջ 250ա։

4 Նույն տեղում, էջ 243ա։

5 Նույն տեղում, էջ 250ա։

6 Նույն տեղում, էջ 251ա։

7 Նույն տեղում, էջ 248ա։

8 Նույն տեղում, էջ 250ա։

9 Նույն տեղում, էջ 250բ։

10 Նույն տեղում։

11 Նույն տեղում, էջ 251ա։

նմանեցնել մարդուն: Նրանք մանուկներին էլ նման չեն, որովհետև բանականությունը մանուկների մոտ թեև չի երևում, բայց և այնպես գոյություն ունի որպես հնարավորություն: «Եւ ոչ տղայ մանկանց չեն նման,— գրում է Իմաստասերը,— զի թէպէտ և չերևի ներգործութեամբ բանական, սակայն զօրութեամբ են»¹:

Իմաստասերը կանգնած է այն տեսակետի վրա, թե ճանաչելու ունակությունը որպես հնարավորություն բնությունից տրված է բանականին, նրա հատկանիշն է: Մարդու բանականությունը պոտենցիալում ունի արտաքին աշխարհը ճանաչելու կարողություն, որը դիտելիքների է վերածվում այն ժամանակ, երբ մարդն ուսումնասիրում է իրեն շրջապատող օբյեկտիվ աշխարհը: Հենվելով Արիստոտելի վրա, Իմաստասերը գրում է. «Արիստոտելէս երկուս ախորժկ անուանել զոր ի մեզ բանականն՝ ըստ զարութեան զմեծ և զմիւսն՝ ըստ ներգործութեան: Զգաւորութեամբ զմիտն ամենեցուն ունել, իսկ ըստ ներգործութեան՝ կարի յոյժ սակաւաց, իմաստասիրաց միայն: Եւ զգաւորութեամբն բնաւորական զոլ, իսկ զներգործութեամբն ի գրուստ մտեալ, որ է ուսմամբ և երկայսիրութեամբք առաքինացործել և լինել կատարելամիտ»²:

Մարդուց անկախ, օբյեկտիվորեն գոյություն ունեցող աշխարհը, նրա իրերն ու երևույթները, ըստ Իմաստասերի, մարդ ճանաչում է բանականությամբ՝ զգայարանների միջոցով: «Գոռնարան զգաւորիներս չուղիղ և յառաքինի մտաց կարգաւորեալը և հարմարեալը, որպեսզի նորաբ և ինքն իմաստասիրեսցէ զբնութեան ամբողջ»³.— գրում է նա:

Ուրեմն, աշխարհի առարկաների ու երևույթների մասին մեր առաջին տպավորությունները ստանում ենք զգայարանների միջոցով: Խոսելով մարդու հինգ զգայարաններից շոշափելիքի մասին, Իմաստասերը գրում է. «Շոշափականն ոչ ձևաց ևեթ, այլև բովանդակ իսկ է զգայարանաց և մարմնոյն ամենայնի, բանզի որ զգա ջերմութեան և ցրտոյ կամ խոնաւոյ և դամարութեան, զոգտրկն և զխոշոր և զանգալտ և զխիստ՝ շաւշափելիք են, զոր հասարակ ամենաւնին վիճակեցան ունել կենդանիք, թէպէտ և չոյովր ի նոցանէ ոչ զոմանս ի զգայարանաց շորից»⁴: Հանաչողության պրոցեսը, սակայն, դիտակցական գոռնունությունն է: Զգայարաններն ինքնին, առանց դիտակցության միջամտության չեն կարող մեղ դիտելիքներ տալ աշխարհի իրերի ու երևույթների մասին: Եթե հնարավոր լիներ միայն զգայարաններով, առանց դիտակցությունից ու բանականության ճանաչելի աշխարհը, ապա ճանաչելու ունակությունն օրված կլիներ ոչ միայն մարդուն, այլև կենդանիներին, բոլորովին նրանք ևս ունեն զգայարաններ: Եթե կենդանիները, որոնք գործողություններ են կատարում, կարողանում են պահպանել իրենց գոյությունն ու սերունդը, ինչպես արգեն ջույց տվեցինք վերևում, ղեկավարվում են ոչ թե դիտակցությամբ՝ ճանաչելով աշխարհի իրերն ու երևույթները, այլ լուր բնազդով, որոնք նրանց տրված է բնությունից, ապա մարդը, բնականապես, լուրջամ կամի գործել,— գրում է Իմաստասերը,— ոչ առանց խորհելոյ յառաջ և քննելոյ միտ ի գործ, այլ յառաջ հոգին ի խորհուրդն գործել և ապա խորհուրդն ի զգալիսս»⁵:

Աշխարհի իրերը և երևույթները ճանաչելու համար նյութ տալիս են զգայարանները, «եռորան մեր՝ մարմինս, և գուռն՝ զգալութիւնս, և նստել՝ միտքն»⁶: Տեսնելով, շոշափելով իրերը մարդը նրանցից ստանում է առաջին տպավորությունը, սակայն, ըստ Իմաստասերի, բանականությամբ է, որ նա կարողանում է ճանաչել աշխարհը: Չնայած որ մենք զգայարաններով ենք կարողանում ստանալ առաջին պատկերացումը առարկաների, բնության երևույթների մասին, բայց սոսկ զգալությամբ հնարավոր չէ թափանցել նրանց էության մեջ, իմանալ նրանց բազմակողմանիորեն: «Մտաց աչք յոյով տեսական զօրութիւն ունի»⁷, քան ինքը աչքը, ասում է Իմաստասերը: Բացի դրանից, բնության մեջ կան իրեր և երևույթներ, որ անմիջական զգայական ընկալման չեն ենթարկվում, այդպիսիք մենք իմանում ենք մտքի «հոգեւոյ ակամբք», այսինքն՝ բանականության միջոցով. «անմարմինն հոգեւոյ ակամբք տեսանին և ոչ ձևօք շօշափին»⁸.— գրում է Իմաստասերը:

¹ Մատենադարան, ձեռ. № 2595, էջ 250բ:

² «Հովհաննէս Իմաստասերի մատենագրութիւնը», էջ 307:

³ Մատենադարան, ձեռ. № 7, էջ 102բ:

⁴ Մատենադարան, ձեռ. № 5619, էջ 129բ:

⁵ Մատենադարան, ձեռ. № 2595, էջ 243ա:

⁶ Նույն տեղում, էջ 268բ:

⁷ Նույն տեղում, էջ 268ա:

⁸ Նույն տեղում, էջ 268բ:

Այսպիսով, ինչպես տեսնում ենք, Իմաստասերը մեծ տեղ է տալիս բանականությանը, նա դառնում է, որ առանց բանականության ակտիվ գործունեության զգայարանները պասսիվ են, նրանք իրենք արտաքին աշխարհից տպավորություններ են ստանում մտքի միջնորդությամբ միայն, իրենց «գոուլը» բաց են անում արտաքին աշխարհի առաջ այն ժամանակ, երբ այդ անհյուս՝ համար զգայարաններին թելադրում է միտքը: «Միտքն որչափ յինքնան է և չէ ի զգալիս»¹ զգալությունն հնազանդին նմա², — գրում է նա: Այստեղ Իմաստասերը որոշակիորեն պաշտպանում է այն տեսակետը, թե միտքը զգալության նկատմամբ ակտիվ է, իսկ զգալությունը պասսիվ է, ուստի առանց մտքի գործունեության, սոսկ զգայարաններով աշխարհի մասին դիտելիքներ ունենալ չի կարելի: Այս պատճառով՝ «զգալությունն է կին խորհրդոյն, զի խորհորդն, սերման է և զգալությունն կրեն»³: Սակայն, ինքը՝ միտքը ևս առանց զգալության տրամադրած տվյալների անզոր է. նա չի կարող «գործել», եթե զգայարանները նյութ չեն տալիս նրան: «Զի միտքն, — գրում է Իմաստասերը, — զգալեօքն շարժի, վասն որոյ և չղործէ միտքն նախ քան զգալը»⁴: Այսինքն՝ Իմաստասերը իմացության պրոցեսը գիտում է որպես բանականության և զգայարանների գործունեության արդյունք. նա պաշտպանում է զգալության և բանականության միմյանդարձ պայմանավորվածության սկզբունքը՝ ակտիվ դերը տալով բանականությանը:

Մեծ տեղ հատկացնելով բանականությանը և միաժամանակ շփերազնահատելով զգայարանների դերը ճանաչողության մեջ, Իմաստասերը մերժում է մեծ դիտելիքների բնածին լինելու տեսակետը: Գիտելիքները մարդուն տրվում են «ուսման» և «աշխատութեան» միջոցով: «Միայն բանականին է ունակական գիտությունն և արուեստ իմաստութեանն, զոր շունքն յառաջ և ուսմամբ և գիտ»⁵, — գրում է նա:

Աշխարհի երևույթների և իրերի ճանաչողությունը մեկ անգամից չի տրվում, այն նվաճվում է աստիճանաբար և տեական ուսումնասիրության արդյունք է: Այս պատճառով՝ գիտությունները, որոնց նպատակն է աշխարհի երևույթների ու առարկաների բացատրությունը տալ, աստիճանաբար են հասնում ճշմարտության բացահայտմանը: Իմաստասերը գրում է. «Զի որպէս արուեստ բժշկութեան ոչ ի սկզբանցն ճշգիւ ամենայն գիտացեալ եղև, այլ առ սակաւ սակաւ, նոյնպէս և շրջաբերութիւն արեգական և լուսնի առ սակաւ սակաւ գիտացեալ եղև»⁶:

Ըստ և՛ույթան գիտությունների դարդացումը երևույթների մասին մարդկանց թերի, ոչ լրիվ գիտելիքներից ու պատկերացումներից դեպի ավելի բարձր ու կատարյալ գիտելիքների և բարձր ուսման գնացող պրոցես է: «Ըստ արուեստի և մակացութեան հնար է մերթ զնոյն ինքն ճշմարտութիւնն և մերթ՝ մերձ առ ճշմարտութիւնն, և զայսոսիկ դարձեալ երկակի՝ և կամ աւել և կամ սուղ դտանել»⁶, — գրում է Իմաստասերը: Սրանից հետևում է, որ գիտությունների զարգացումը միաժամանակ սխալ, բարձր ուսման գիտելիքների աստիճանական ուղղում է:

Իմաստասերը գրում է. «Քանզի աշխատութեան և տնտեսութեան պէտք են՝ առ ի գիտել գտութիւնն և իրաց, վասն զի ոչ բանն գիտս հաստատէ, այլ իրն՝ գրանն, որչ ու վար են խնդրել զճշմարտութիւն: Ապա ոչ և պարտաւ հայել ի բանիցն շաղակրատանս, քէպէտ և հաւանական քուսցի: Քանզի բանն նշանակիլ իրին է՝ չէ իրաւացի հակառակ իրացն արտաբերիլ, այլ միայն նշանակութեան հետեւ»⁷: Այստեղից հետևում է, որ մարդ ճանաչում է սուբյեկտից անկախ գոյություն ունեցող աշխարհը, նրա առարկաներն ու երևույթները: Գիտելիքների նկատմամբ արտաքին աշխարհն առաջնային է, անկախ է և նյութ է տալիս մեր իմացությանը: Հասկացությունները, մեր մտքերը առարկաների ու երևույթների մասին չեն կարող պայմանավորել նրանց գոյությունը, մինչդեռ, ընդհակառակը, իրերով ու երևույթներով են պայմանավորված մեր գիտելիքները, այսինքն՝ իրերն առաջնային են, իսկ մեր գիտելիքները երկրորդային: Մարդը կարող է բազմաթիվ բառեր, մտքեր արտահայտել, ինչպես ասում է Իմաստասերը «շաղակրատան», սակայն կարող է պատահել, որ դրանք ճիշտ չարտացոլեն իրականությունը: Ճշմարիտ են, բայց Իմաստասերի, միայն այնպիսի մտքերը, որոնք համապատասխանում են իրականու-

¹ Ըստ հայագրան, ձև. № 2595, էջ 259ա:

² Նույն տեղում, էջ 252ա:

³ Նույն տեղում, էջ 260բ:

⁴ Նույն տեղում, էջ 250բ (ընդգծումն իմն է—Գ. Գ.):

⁵ Հովհաննես Իմաստասերի մատենագրությունը, էջ 224:

⁶ Նույն տեղում, էջ 255:

⁷ Նույն տեղում, էջ 238 (ընդգծումն իմն է—Գ. Գ.):

թյանը, որոնց իսկությունը ստուգված է: Մեր ըմբռնումները իրերի և երևույթների մասին կարող են փոխվել, սակայն զրանից իրերն ու երևույթները չեն փոխվում, որովհետև իրականությունն ինքն է մեղ մտքեր տալիս: Մեր գիտելիքները, որոնք օբյեկտիվ աշխարհի արտացոլումն են, կարող են ճիշտ կամ սխալ, թերի կամ լրիվ լինել, մեր տրամաբանական կառուցումները աշխարհի մասին կարող են հավանական լինել, բայց զրանից արտաքին աշխարհը համապատասխան փոփոխության չի ենթարկվում: Սկզբից զիջելով անգույն բերել բանին ոչ ասիլ իրեն հաստատապես կացելույ, — գրում է Իմաստասերը, — Բանի երկ ասլ բան և երկ ոչ, իրեն անսխալ ունի զիրուքեանն իւրոյ յատկութիւն»¹, Ուստի, միայն օբյեկտիվ աշխարհն է, որ կարող է հավաստել մեր միտքը: Եթե միտքը ճիշտ է արտահայտում իրերի էությունը, առարկաների փոփոխարարությունը, ապա նա ճիշտ է, իսկ եթե ոչ՝ սխալ է: Այսպիսով, ըստ Իմաստասերի, ոչ թե մեր մտքերն են հաստատում ու բնորոշում իրականությունը, այլ օբյեկտիվ աշխարհն է հաստատում ու բնորոշում մեր մտքերը: Մեր մտքերը ոչ այլ ինչ են, քան մարդուց անկախ, ռեալ զոյություն ունեցող աշխարհի արտացոլումը: Իմացության բովանդակությունը օբյեկտիվ աշխարհն է:

Օբյեկտիվ իրականության մասին ձեռք բերած գիտելիքները մարդիկ իրար հաղորդում են բառերի ու խոսքի միջոցով՝ յուրաքանչյուր առարկայի և երևույթի տալով իր անունը: Առարկան, նրա էությունն առաջնային է, իսկ նրա անունը, անվանումը՝ երկրորդային: Անունը կարող է ճիշտ ու ամբողջապես չարտահայտել առարկայի կամ երևույթի էությունը՝ «ոչ զանունն, սակայն զէութիւն ստուգապէս ցուցանէ, և քաջ է էութիւն իսկական, քան զանունն պիտակ ոչ խոտելով ինչ զայն, որ է առաջին»², — գրում է Իմաստասերը:

Վերը բերված՝ Իմացության, գիտելիքների նկատմամբ արտաքին աշխարհի առաջնության, անկախության մասին մտքերից հետևում է նաև, որ Իմաստասերը միջնադարում չափազանց վիճելի ու կարևոր հարցերից մեկը՝ ընդհանուրի և մասնավորի փոխհարաբերության հարցը՝ նրանց առաջնության տեսակետից, լուծում է հոգու մասնավորի և հանդես է դալիս նոմինալիզմի պաշտպանությամբ: Եթե առաջնային են կոնկրետ իրերը, իսկ մեր գիտելիքները, մտքերը՝ նրանք մասին ածանցվում են նրանցից, պայմանավորվում են այդ կոնկրետ իրերով, ապա, որեմն, ռեալ զոյություն ունեն և առաջնային են ոչ թե ընդհանուր հասկացությունները, այլ ևզակին, մասնավորը, կոնկրետ զգայական իրերը: Այս է հաստատում նաև Իմաստասերի հետևյալ միտքը՝ «առաջին և առաւել զոյացութիւնը ասին անհատքն»³:

«Բանը», դադարիար, միտքը օբյեկտիվորեն զոյություն ունեցող առարկաների և իրերի մասին մեր պատկերացումների, ըմբռնումների արտահայտությունն են: Այդ ըմբռնումների և պատկերացումների սխալ կամ ճիշտ լինելը, ըստ Իմաստասերի, պետք է հաստատվի և կարող է հաստատվել միայն փորձով: Նա դեմ է նրանց, որոնք ճշմարտությունը ձգտում են հավաստել գույն խոհանարարությամբ, առանց զիմելու փորձին, առանց գործով այն ապացուցելու: «Պարտ է իմաստակացն գիտականութիւնն գործովը տեսանել, առաւել քան բանիւ»⁴, — գրում է Իմաստասերը:

Իմաստասերը ճանաչողության պրոցեսում մեծ տեղ է տալիս փորձին: Ալիշանը, հենվելով Իմաստասերի իրեն հայտնի աշխատությունների մտքերի վրա, գրում է. «Ինքն (Իմաստասերը — Գ. Գ.) ուսումնական բաներ սովորել և գրելու համար յայտնապէս կու պահանջէ, թէ «ամենեին բազմաժուտ պարտ է գոյ ձեռնարկողին այսմ, ոչ միայն սրբոց և աստուածաշունչ զրոց, այլև արտաքնոց»: Ասկէ այլ զեղեցիկ և հաստատուն փիլիսոփայութեամբ կու պահանջէ, որ ուսումն կամ գիտութիւնն փորձով ալ ստուգուի: «Դարձեալ թէ և սորօք կիրթ և վարժ, առանց փորձի՝ կարծիքն հաւատարմանալ ոչ կարուցէ. և փորձն՝ հաստատուն և անբկրայ... վասն զի ոչ է պարտ միայն հնազիտակ լինել այլ և ինքնաբար»⁵: Իմաստասերը գիտական ճշմարտությունները սահմանելու հարցում դեմ է եղել հեղինակությունների ճանաչմանը: Քանի որ, տրամաբանում է նա, բնության իրերի ու երևույթների մասին մեր գիտելիքները աստիճանաբար են ձեռք բերվում՝ ավելի թերի ըմբռնումներից դնում են դեպի ավելի ամբողջական, բազմակողմանի ու կատարյալ ըմբռնումները, ապա չի կարելի, հենվելով հեղինակությունների վրա, պնդել մի որևէ երևույթի մասին մեր գիտելիքների բացարձակ հավաստիությունը: Դիտա-

¹ «Հոյհան» և Իմաստասերի մտտեանագրութիւնն», էջ 253 (ընդգծումն իմն է — Գ. Գ.):

² Նույն տեղում, էջ 278 (ընդգծումն իմն է — Գ. Գ.):

³ Մատենադարան, ձեռ. № 2751, էջ 218ա:

⁴ Մատենադարան, ձեռ. № 2593, էջ 275ա:

⁵ Ղ. Ալիշան, Յուզիկը հայրենեաց հայոց, Վենետիկ, 1921, հատ. Բ, էջ 262 (ընդգծումն իմն է — Գ. Գ.):

կան ճշմարտությունների հասնելու խնդրում մեծ դեր է խաղում կասկածը, որի դեպքում պետք է դիմել փորձին և քննությանը՝ որպես մեր գիտելիքները ստուգելու հավաստի միջոցների: «Անմ հայնց դիւրահաւան,— գրում է Իմաստասերը,— որ առանց քննութեան հաւատամ ամենայն բանից և պատրիմ, զի առանց քննելոյ և փորձելոյ չէ պատեն հաւանել ամենայն բանից»¹:

Սակայն փորձի ու քննության դերը, ըստ Իմաստասերի, դրանով չի սահմանափակվում, փորձի նպատակն ու նշանակությունը միայն այն չէ, որպեսզի ստուգենք մեր գիտելիքների ճշմարտացիության ստորիմանը: Փորձը և քննությունը միաժամանակ հիմք են հանդիսանում բնության նոր երևույթների ու իրերի բովանդակության բացահայտման համար, նոր օրինաչափությունների ճանաչման համար: Փոսի որ բնության մէջ երևույթներն ու իրերը փոխադարձորեն կապված են, պայմանավորում ու հաջորդում են իրար, մեկը առաջացնում է մյուսը՝ «առանց պատճառի չկայ իրք»², ուստի մի երևույթի, իրի ուսումնասիրությունը և ճանաչումը հիմք է հանդիսանում այդ երևույթից կամ իրից բխող հետևանքի ուսումնասիրության և ճանաչման համար: «Տեսանելի օրինակաւ,— գրում է Իմաստասերը,— իմանալը և քննելը զառաջիկայն, որ լինելոց է, զի ապականին և նոքա, որպէս զայն, որ տեսանեմք»³:

Իմացությունը, աշխարհի երևույթների և իրերի ճանաչումը, ըստ Իմաստասերի, ինքնաբով պրոցես է, այն հետապնդում է պշակտիկ նպատակներ: Նրա գլխավոր խնդիրն է մարդկանց գոյավիճակի բարելավումը: Այս պատճառով՝ աշխարհի երևույթների բմբոնումը ոչ միայն տեսական նշանակություն ունի, այլև՝ գործնական: Այսպես՝ սխալ բմբոնումը վնասում է ոչ սխալն հայնցողական ճշմարտությանը, այլև անձին, մարդուն: «Ստուծին ոչ միայն ճշմարտութեան, այլև անձին ոսոխ է»⁴,— գրում է Իմաստասերը:

Այսպիսով, ինչպես տեսնում ենք, Իմաստասերի աշխարհայացքը, որը դեռևս պարուրված է միջնադարյան կրոնական բմբոնումների մշուշով, ունի լուսավոր շատ տարրեր: Հանգես գալով կրոնի անունից, նա, միաժամանակ, աշխատում է կրոնից անկախ մտածել, շատ հարցերում դուրս գալով եկեղեցական դոգմաների սխտեմից: Իմաստասերի բնագիտական, իմացաբանական հայացքները, նրա նոմինալիզմը, փորձի, գիտությունների զարգացման, օբեկտիվ աշխարհի ճանաչողության և այլ հարցերի մասին նրա մտքերը միջնադարի պայմաններում առաջադեմ էին և արժանի բարձր գնահատականի:

Հանձին Իմաստասերի հայ միջնադարը, XI—XII դարերը, հրապարակ են հանել մի այնպիսի մտածողի, որը շափազանց որոշակիորեն առաջադրում է մի շարք հարցեր, որոնք բարձրացվում են միայն հետագա դարերում՝ բրիտոնական-կրոնական դոգմատիկ ու սխոլաստիկ մտավնության դեմ բմբոնացող, բնական գիտությունների զարգացման համար մաքառող առաջավոր մտածողների կողմից:

Հովհաննես Իմաստասերի փիլիսոփայական, բնագիտական առաջավոր հայացքները օբեկտիվորեն ճանապարհ էին հարթում աստվածաբանական, կրոնական միստիկայից անկախ հայ մտքի հետագա զարգացման համար, նպաստում էին այնպիսի առաջավոր մտածողների ապարելզ գալուն, ինչպիսիք են Հովհաննես Երզնկացին, Վահրամ Ռարունին, Հովհան Որոտնեցին, Գրիգոր Տաթևացին և ուրիշներ:

ФИЛОСОФСКИЕ ВЗГЛЯДЫ ИОАННА ИМАСТАСЕРА

Г. О. ГРИГОРЯН

(Р е з ю м е)

Иоанн Имастасер (род. ок. 1045—1055 гг., ум. в 1129 г.) является одним из выдающихся мыслителей средневековой Армении. Однако до настоящего времени нет более или менее цельного исследования о его мировоззрении. В данной статье делается первая попытка осветить философские воззрения Имастасера.

¹ Մատենադարան, ձեռ. № 2595, էջ 250ա (ընդգծումն իմն է—Գ. Գ.):

² Նույն տեղում, էջ 247ա:

³ Նույն տեղում, էջ 242բ:

⁴ Մատենադարան, ձեռ. № 2751, էջ 193ա:

Иоанн Имастасер, как и подавляющее большинство мыслителей-философов средневековой Армении, основной вопрос философии решал идеалистически, в пользу первичности бога и вторичности природы. Однако он не повторял церковное понимание вопроса догматически, а, используя аристотелевскую категорию возможности и действительности, стремился философски и логически обосновать его и таким образом сделать вопрос приемлемым для разума.

Все предметы, вещи природы, растительный и животный мир, согласно Имастасеру, имеют свою качественную определенность и состоят из четырех элементов: воздуха, земли, воды, огня.

У Имастасера имеются попытки диалектического осмысления природы. Природу он воспринимает как единство противоречий. Противоречие является следствием соединения в предметах противоположных элементов и присуще как неодушевленному, так и одушевленному миру.

Имастасер выступал против мистификации явлений природы и критиковал суеверие. Явления природы он старался объяснить (в рамках достижений науки своей эпохи) не сверхъестественными силами, а силами самой природы и боролся за развитие научных знаний о природе.

Предметы и явления мира, согласно Имастасеру, познаваемы. Познание, как возможность, является свойством разума, которым наделен только человек. Процесс познания начинается с ощущений. Без данных органов чувств познание невозможно. В познании Имастасер большое значение придает разуму. Только разумом, говорит он, можно вникнуть в сущность явлений и предметов.

Человек познает существующий независимо от него объективный мир. Познание природы — это постепенный процесс, поднимающийся от низших, несовершенных знаний к высшим, более совершенным, притом этот процесс восхождения совершается путем наблюдений и изучения природы. Имастасер отвергал авторитет в установлении научных истин. В процессе познания он большое место уделял опыту и требовал проверки знания опытом. «Без опыта мнение не может быть достоверным; опыт прочен и несомненен», — пишет он.

Имастасер стоит на позициях номинализма. Он утверждает, что реально существуют и первичны конкретно-конечные вещи, а не общие понятия. «Первичной и преимущественной сущностью являются индивиды», — пишет он.

Философские и естественно-научные взгляды Иоанна Имастасера в условиях средневековой действительности были весьма прогрессивными. Объективно они расчищали дорогу для дальнейшего развития идей, свободных от религиозной мистики и догматики, и способствовали появлению таких прогрессивных для своего времени мыслителей, как Иоанн Ерзынкаци, Ваграм Рабуни, Иоанн Воротнеци, Григор Татеваци и др.